

G
460
C5
1793

X. 11



海國聞見錄

重刻海國聞見錄

陳資齋先生海國聞見錄圖說爲防戍經商必用之
書前陞任香山明府彭竹林以是出大洋殲海寇予
見而愛之摹繪手卷藏諸行篋今晴蘭林先生復訪
得原本校正貽予重刻以廣其傳俾有事洋面者咸
知趨避予老矣如淵明之讀山海經不過藉以推擴
見聞世有偉人立勛溟渤安知功名富貴不卽在不
龜手之藥也哉

乾隆癸丑年午月浙江

石門馬俊良重訂
蛟川林秉璐校字

序

聞見錄序

我

國家

歷聖相承德洋恩溥版圖所屆極地際天蓋自負古
以來未有若斯之遠且大者也故其海防自塞
外以迄幽冀齊魯吳越閩粵袤延幾千萬里列
鎮建營星羅棋布兼有額設戰艦分員遊巡海

詳他如沙礁之險夷也使浮海者知所避就萑
苻之伏藏也使哨巡者知所追捕蓋安邦靖匪
之策于是乎在吾聞古來以著述世其業者班
則爲彪固馬則有談遷今先生是錄得諸

尊人所授而又節鉞所屈悉任海疆故能續承先
志衣德紹聞至所云志

聖祖仁皇帝暨先人之教於不忘則是錄也益可以
見先生忠孝之大節豈與夫班馬諸人徒以文

字垂聲而已若余尸素海濱涔蹄未涉披展之下不免望洋而歎也夫豈

乾隆九年歲次甲子夏月閩浙制使洪科弟那

蘇圖拜謨



海國聞見錄序

乾坤闔闢以來海爲大海者晦也言其荒遠冥昧聞見眩惑也邵子云所謂中國者天下八十分之一有裨海環之又有大瀛海環之聞見爲難陳白沙云今之四海非海也凡地下皆水此乃水之溢出地者聞見猶易嗟乎由二公之言觀之聞見難耶易耶吾聞忠於君者必能盡其職苟職任海濱測星辰之分野占氣候之速

遲辨飲食言語之不同察島嶼洲渚之各異非
如象罔之索珠狼臙之齧金則其言卓乎可傳
矣我

皇上四海一家九有截服欽

聖聖之相承丕無外之基業萬國衣冠共球畢至所以
頌昇平而靖海氛者百餘年矣其間水陸要隘
軍容嚴整慶得人於師中寄股肱於要地
皇圖有磐石之安金甌無或缺之慮焉同安

資齋陳公以卓犖雄才世傳其美開闢崇明移節
甬上爲全浙金湯之倚與余同守海邦縱言防
海之畧輒口講指畫直授要隘百餘所若燭照
數計洞然無疑指螺掌壑當下可信知其經臨
往復非一日矣越時郵寄海國聞見錄二冊示
余披其圖繪註說如覽十洲記如讀山海經前
明籌海圖編紀效新書遜其經畫能不望洋而
驚向若而歎耶綜其本末蓋由

贈公宦浙江及移粵鎮皆酷嗜周諮凡漢夷舶師
濱海華顛之老習知海事者必詳詢而備誌之
公復益以見聞裒然成集此手澤之所以長新
而

公之豐功懋績亦因之不朽矣應亟壽之梓上
以佐

廟算下以協寅恭有裨於經傳之學不其偉歟是
爲序

乾隆八年歲在癸亥嘉平月納蘭弟常安拜題



海國聞見錄序

九州之大環以裨海混茫際天冥晦莫測周禮
職方晰載地域廣輪土會名物而於海則闕如
焉非以蓬島滄溟固難尋其涯涘歟我

國家幅員廣大臺灣亦臣服內郡海島承順纖塵
不驚往來帆舶咸得占風而至不有紀載曷以
揚厲昇平天挺偉人雄才世濟惟

資齋陳公足當之公自幼從

贈公宦遊熟聞海洋形勢識記倍萬人自建績澎湖開鎮百粵比今提督甬東皆密邇海疆任東南鎖鑰之寄因出其海國聞見錄畀予其形勢則起遼左達登萊下迨江浙閩廣其方隅則由東洋東南洋南洋下迨大小西洋其所見聞異詞如鳴鐘爲日苗隨水長光恠陸離莫知紀極凡山川之阨塞島嶼之縈紆道里之遠近以及人物風土之奇異如聚米畫沙一一筆之於書


繪之爲圖噫是編也豈徒備職方之所未載將
使服官海邦者策防禦而警寇掠商賈之往來
海上者亦得涉險而無虞於以佐

聖朝清晏之澤於無垠厥功偉哉昔詩之美召公曰
于疆于理至於南海而勉之以肇敏戎公且錫
以圭瓚秬鬯使祀其先祖而終之以對揚王休
惟公荷

三朝厚恩懋建勲績又能謹誌

贈公之教於不忘篤棊之忠繼述之孝一身兼之
宜乎耀美旂常垂輝金石也若徒美紀載之綜
覈是猶不免蠡測之見也夫

乾隆九年歲次甲子仲冬月長洲弟彭啟豐拜
題



序

先公少孤貧廢

學賈往來外洋見老於操舟

者僅知針盤風信叩以形勢則茫然間有能道
一二事實者而理莫能明先公所至必察其面
勢辨其風潮觸目會心有非學力所能造者康
熙壬戌

聖祖仁皇帝命征澎臺遣靖海侯施公琅提督諸軍旁
求習於海道者先公進見聚米爲山指畫形勢

定計候南風以入澎湖遂藉

神策廟算應時戡定又奉施將軍令出入東西洋招訪

鄭氏有無遁匿遣人凡五載敘功授職再遷至

碣石總兵擢廣東副都統皆濱海地也

倫炯蒙

帝殊恩得充侍衛親加教育示以沿海外國全圖康

熙六十年

授臺灣南路叅將

皇上嗣位蒙

恩遷澎湖副將移臺灣水師副將卽

擢授臺灣總兵移鎮高雷廉又皆濱海地也

倫炯自

爲童子時先公於島沙澳阻盜賊出沒之地輒
諄諄然告之少長從先公宦浙聞日本風景佳
勝且欲周諮明季擾亂閩浙江南情實庚寅夏
親遊其地及移鎮高雷廉壤接交趾日見西洋
諸部估客詢其國俗考其圖籍合諸

先帝所圖示指畫毫髮不爽乃按中國沿海形勢外洋

諸國疆域相錯人風物產商賈貿遷之所備爲
圖誌蓋所以志

聖祖仁皇帝暨先公之教於不忘又使任海疆者知防
禦搜捕之扼塞經商者知備風潮警寇掠亦所
以廣我

皇上保民恤商之德意也

雍正八年歲次庚戌仲冬望日

同安陳倫炯謹誌



海國聞見錄目次

上卷

天下沿海形勢錄

東洋記

東南洋記

南洋記

小西洋記

大西洋記

崑崙
即崑崙

南澳氣

下卷

四海總圖

沿海全圖

臺灣圖

臺灣後山圖

澎湖圖

瓊州圖

皇朝圖

天下沿海形勢錄

天下沿海形勢。從京師天津東向遼海。鐵山黃城皮島。外對朝鮮。左延東北。山海關寧遠。蓋平復州。金州。旅順口。鴨綠江而抵高麗。右袤東南。南山東之利津。清河蒲臺。壽光海倉口。登州而至廟島。成山衛。登州與旅順口南北隔海對峙。東懸皮島。西匝兩京。登萊是爲遼海。登州一郡。陡出東海。盡於成山衛。海船往盛京天津者。以成山爲標準也。成山衛轉西南則靖海。

大嵩萊陽鰲山靈山而至江南海州。此皆登州西南之海也。海州而下。廟灣而上。則黃河出海之口。河濁海清。沙泥入海。則沉實。支條縷結。東向汙長。潮滿則沒。潮汐或淺或沉。名曰五條沙。中間深處呼曰沙行。江南之沙船。往山東者。恃沙行以寄泊。船因底平。少閣無碍。閩船到此。則魄散魂飛。底圓加以龍骨三段。架接高昂。閣沙播浪。則碎折。更兼江浙海潮。外無藩扞。屏山以緩水勢。東向澎湃。故潮汐之流。比他省爲

最急。乏西風。開避舟。隨溜。閤靡不爲壞。是以海舶往
山東兩京。必從盡山對東。開一日夜。避過其沙。方敢
北向。是以登萊淮海。稍寬海防者。職由五條沙爲之
保障也。廟灣南。自如臯通州。而至洋子江口。內狼山。
外崇明。鎖鑰長江。沙坂急潮。其概相似。而崇明上鎖
長江。下扼吳淞。東有洋山馬蹟花腦。陳錢諸山。接連
浙之寧波。定海外島。而嘉興之乍浦。錢塘之鯨子。餘
姚之後海。寧波之鎮海。雖沿海相聯要疆。但外有定

海爲之扞衛。實內海之堂奧也。惟乍浦一處。濱於大海。東達漁山。北達江南之洋山。定海之衢山。劔山。外則汪洋。言海防者。當留意焉。江浙外海。以馬蹟爲界。山北屬江山。南屬浙。而陳錢外在東北。俗呼盡山。山大澳廣。可泊舟百餘艘。山產水仙。海產淡菜。蚌屬海鹽。小魚賊舟每多寄泊。江浙水師更當加意於此。南之海島。由衢山岱山而至定海。東南由劔山長塗而至普陀。普陀直東之外。出洛迦門。有東霍山。夏月賊

舟亦可寄泊。伺劫洋舶回棹。且與盡山南北爲犄角。山脚水深。非加長旋纜。不足以寄。普陀之南。自崎頭至昌國衛。接聯內地。外有韭山吊邦。亦賊舟寄泊之所。此皆寧波郡屬。自寧波台州黃巖沿海而下。內有佛頭桃渚崧門楚門。外有茶盤牛頭積穀蟹壳石塘枝山大鹿小鹿。在在皆賊艘出沒經由之區。南接樂清溫州瑞安金鄉蒲門。此溫屬之內海。樂清東峙玉環。外有三盤鳳凰北岬南岬。而至北關。以及閩海接

界之南關。實溫台內外海逕寄泊樵汲之區。不可忽也。閩之海內。自沙埕南鎮烽火三沙斗米北茭定海五虎而至閩安。外自南關大嶽小嶽間山芙蓉北竿塘南竿塘東永而至白犬。爲福寧福州外護左翼之藩籬。南自長樂之梅花鎮東萬安爲右臂。外自磁澳而至草嶼。中隔石牌洋。外環海壇大島。閩安雖爲閩省水口咽喉。海壇實爲閩省右翼之扼要也。由福清之萬安南視平海內。虛海套是爲興化。外有南日湄

洲再外烏坵海壇所當留意者東北有東永東南有
烏坵猶浙之南岬北岬積穀弔邦韭山東霍衢山江
之馬蹟盡山是也泉州北崇武獺窟南祥芝永寧左
右拱抱內藏郡治下接金廈二島以達漳州金爲泉
郡之下臂厦爲漳郡之咽喉漳自太武而南鎮海六
鰲古雷銅山懸鐘在在可以寄泊而至南澳以分閩
粵泉漳之東外有澎湖島三十有六而要在媽宮西
嶼頭北港八罩四澳北風可以泊舟若南風不但有

山有嶼可以寄泊。而平風靜浪。黑溝白洋。皆可暫寄。以俟潮流。洋大而山低。水急而流迴。北之吉貝。沉礁一線。直生東北。一目未了。內皆暗礁。佈滿。僅存一港。蜿蜒。非熟習深諳者。不敢棹至。南有大嶼。花嶼。猫嶼。北風不可寄泊。南風時宜巡緝。澎湖之東。則臺灣。北自鷄籠山對峙。福州之白犬洋。南自沙馬崎對峙。漳之銅山。延綿二千八百里。西面一片沃野。自海至山。淺濶相均。約百里。西東穿山至海。約四五百里。崇山

登筭野番類聚。建一郡分四縣。山川形勢生熟番性。蜂窠蟻穴。誌考備載。郡治南抱七昆身。而至安平鎮大港。隔港沙洲直北至鹿耳門。鹿耳門隔港之大線頭沙洲。而至隙仔海翁隙。皆西護府治。而港之可以出入巨艘。惟鹿耳門與鷄籠淡水港。其餘港汊雖多。大船不能出入。僅平底之澎船。四五百石之三板頭船。堪以出進。此亦海外形勢。以扞內地沿海要疆。南澳東懸海島。扞衛漳之詔安。潮之黃岡。澄海。閩粵海。

洋適中之要隘。外有小島三。爲北澎中澎南澎。俗呼爲三澎。南風賊艘經由暫寄之所。內自黃岡大澳而至澄海放鷄廣澳錢澳靖海赤澳。此雖潮郡支山入海。實爲潮郡賊艘出沒之區。晨遠颺於外洋。以伺掠。夜西向於島澳。以偷泊。而海賊之尤甚者。多潮產也。赤澳一洋。自甲子南至淺澳田尾遮浪汕尾鮑門港大星平海。雖屬惠州。而山川人性與潮無異。故於居中碣石立大鎮。下至大鵬佛堂門將軍澳紅香爐急

水門由虎門而入粵省。外自小星筆管。浣寧福建頭。
大嶺山小嶺山。伶仃山。旗纛嶼。九州洋而至老萬島。
嶼不可勝數。處處可以樵汲。在在可以灣泊。粵之賊
艘。不但艚艍海泊。此處可以伺劫。而內河槳船。櫓船。
漁舟。皆可出海羣聚。剽掠粵海之藏垢納污者。莫此
爲甚。廣省左扞虎門。右扼香山。而香山雖外護順德。
新會。實爲省會之要地。不但外海捕盜。內河緝賊。港
汊四通。奸匪殊甚。且其域澳門。外防番舶。與虎門爲

犄角有心者。豈可泛視哉。外出十字門而至魯萬。此洋艘番舶來往經由之標準。下接岸門三竈大金小金烏猪上川下川。舫船澳馬鞍山。此肇屬廣海陽江雙魚之外護也。高郡之電白。外有大小放鷄。吳川外有碇州。下鄰雷州白鴿錦囊。南至海安。自放鷄而南。至於海安中懸碇州。暗礁暗沙。難以悉載。非深諳者。莫敢內行。而高郡地方實藉沙礁之庇也。雷州一郡。自遂溪海康徐聞向南。幹出四百餘里。而至海安。三

面濱海。幅濶百里。對峙瓊州。渡海百二十里。自海安
繞西北至合浦。欽州防城而及交趾之江。平萬寧州。
延長一千七百里。故海安下廉州。船宜南風。上宜北
風。自廉之冠頭嶺而東。白龍調埠川江永安山口。烏
鬼處處沉沙。難以名載。自冠頭嶺而西。至於防城。有
龍門七十二逕。逕逕相通。逕者島門也。通者水道也。
以其島嶼懸雜。而水道皆通。廉多沙。欽多島。地以華
夷爲限。而又產明珠。不入於交趾。是以亭建海角於

廉天涯於欽。瓊州屹立海中。地從海安渡脉。南崖州。
東萬州。西儋州。北瓊州。與海安對峙。瓊山。文昌。樂會。
陵水。感恩。臨高。定安。澄邁。沿海諸州縣。環繞熟黎。而
熟黎環繞生黎。而生黎環繞五指嶺。七指山。五指西。
向。七指南向。周圍陸路一千五百三十里。府城中路。
直穿黎心。至崖州五百五十五里。萬州東路直穿黎。
州至儋州五百九十里。自海口港之東路。沿海惟文。
昌之潭門港。樂會之新潭。那樂港。萬州之東澳。陵水。

之黎菴港。崖州之大蛋港。西路沿海。惟澄邁之馬袅港。儋州之新英港。昌化之新潮港。感恩之北黎港。可以灣泊船隻。其餘港汊雖多。不能寄泊。而沿海沉沙。行舟實爲艱險。內山生黎。嵐瘴殊甚。吾人可住熟黎。而不可住生黎。生黎可住熟黎。而不可到吾地。熟黎夾介其間。以水土習宜故也。此亦海外稍次之臺灣。惜乎田疇不廣。歲仰需於高雷。雖產楠沉諸香。等於廣南。甲於諸番。又非臺灣沃野千里所可比擬也。

漢國圖志金一卷

東洋記

天地之大。何物不容。輕清之氣。包涵萬類。星辰日月。亦有所不及。而聖人測理備至。定四方。製指南。分二十四籌。由近之遠。莫出範圍。啟後世愚蒙。識萬國九州。然而九州之外。又有九州。謹按四方外國地方。海道人物風土。粗據所見聞。而畧誌之。俾後之君子。有所採擇。朝鮮居天地之艮方。聯盛京。對天津。古箕子地。分郡縣。幅員里道。朝貢經由。歷代史典輿圖備紀。

無容勦說。其南隔一洋。日本國屬之對馬島。順風一夜可抵。明關白爲亂者是也。自對馬島而南。寅甲卯東方一帶七十二島。皆日本倭奴之地。而與中國通貿易者。惟長崎一島。長崎產之粟菽。難供食指。開貿易入公家。通計終歲所獲利。就長崎按戶口均分。國王居長崎之東北。陸程近一月。地名彌耶穀。譯曰京。受封漢朝王服中國冠裳。國習中華文字。讀以倭音。予奪之權。軍國政事。柄於上將軍。王不干預。僅食俸。

米受山海貢獻。上將軍有時朝見而已。易代爭奪。不
爭王而爭上將軍。倭人記載。自開國以來。世守爲王。
昔時上將軍會篡奪之。山海應貢之物不產。五穀不
登。陰陽不順。退居臣位。然後順若如故。至今無敢妄
冀者。官皆世官。世祿。遵漢制。以刺史千石爲名祿。厚
足以養廉。故少犯法。卽如年僉舉一街官。街官者。鄉
保也。歲給贍養五十金。事簡而閒。通文藝者爲高士。
優以禮。免以徭。俗尚淨潔。街衢時爲拭滌。夫妻不共

湯羹飲餘。婢僕尚棄之。富者履坐絮蓆。貧者履坐薦。蓆名曰毯。踏棉。各家計攤毯。踏棉之多寡爲戶口。男女衣服大領濶袖。女加長以曳地。畫染花卉文采。禪用帛幅裹繞足。著短襪以曳履。男束帶以插刀。髡鬚而薙頂額。留鬢髮至後枕濶寸餘。向後一挽而繫結。髮長者修之。女不施脂而傅粉。不帶鮮花。剪綵簪珥。而插玳瑁。綠髮如雲。日加滌洗。薰灼楠沉。髻挽前後。爪甲無痕。惟恐納垢。至於男女睂目肌理。不敢比勝。

中華亦非諸番所能比擬。實東方精華之氣所萃。人皆覆姓。其單姓者。徐福配合之童男女也。徐福所居之地。名曰徐家村。其塚在熊指山下。其國男子年五十餘。陽多痿。奴者儂也。故呼之曰倭奴。俗尊佛。尚中國僧敬祖先。時掃墳廬。得香花佳果。非敬佛僧。則上祖墳。人輕生。有犯法者。事覺向荒山割肚自殺。無累他人。立法最嚴。人無爭鬪。語言寂寂。呼童僕。鳴掌則然諾。無售買人口。傭工期滿卽歸。所統屬國二。北對

馬島與朝鮮爲界。朝鮮貢於對馬。而對馬貢於日本。
南薩峒馬與琉球爲界。琉球貢於薩峒馬。而薩峒馬
貢於日本。二島之王俱聽指揮。氣候與山東江浙齊。
長崎與普陀東西對峙。水程四十更。廈門至長崎七
十二更。北風從五島門進。南風從天堂門進。對馬島
坐向登州。薩峒馬坐向溫台。地產金銀銅漆器磁器。
紙箋花卉染印。海產龍涎香馥魚海參佳蔬等類。薩
峒馬山高巉巖。溪深水寒。故刀最利。兼又產馬。人壯。

健嘉靖間倭寇者薩峒馬是也。日本原市舶永嘉因倭之漁者十八人被風入中國。奸人引之爲亂。髡髮薙雍額。雜以遠處土語。遞相攘掠。羣稱倭奴。後平回國。僅十八人。王正以法。隨禁市舶中國。聽我彼往。至今無敢來者。倭載十八奇士。普陀往長崎。雖東西正向。直取而渡橫洋。風浪巨險。諺云。日本好貨。五島難過。廈門往長崎。乘南風。見臺灣鷄籠山。北至米糠洋。香蕈洋。再見薩峒馬大山。天堂方合正針。糠蕈二洋者。

洋中水面若糠粃水泡若葦菌呼之爲米糠洋香葦
洋薩峒馬而南爲琉球也居於乙方計水程六十八
更中山國是也習中國字人弱而國貧產銅器紙螺
甸玳瑁無可交易其衣冠人物貢由福州久熟習見
故不詳載自日本琉球而東水皆東流莊子所謂尾
閭洩之不知何時已而不虛也

檣並進。荷蘭嚴守安平大港。成功從鹿耳門進。水漲
三丈餘。入據臺灣。與荷蘭相持甚久。因喻之曰。臺灣
係我先王所有。現存倭人爲你等所據。今還我地。資
貨無染。荷蘭悉衆而去。至康熙二十二年。鄭克塽歸
順。方入版圖。以承天府爲臺灣府。天興州爲諸羅縣。
萬年州爲臺灣鳳山二縣。雍正二年。分諸羅北之半
線爲彰化縣。鳳山沙馬崎之東南有呂宋。居巽方。厦
門水程七十二更。北面高山一帶。遠視若鋸齒。俗名

宰牛坑山有土番屬於呂宋與沙馬崎西北東南遠
拱中有數島惟一島與臺灣稍近者名曰紅頭嶼有
土番居住無舟楫往來語言不通食薯芋海族之類
產沙金臺灣曾有舟到其處呂宋大山北從宰牛坑
延繞東南昔爲大西洋于絲臘是班呀所據地宜粟
米長者五六分漳泉人耕種營運者甚盛年輸丁票
銀五六金方許居住經商惟守一隅四方分定不許
越界廣納丁票聽憑貿易東南洋諸番惟呂宋最盛

因大西洋干絲臘是班呀番船運銀到此交易。絲綢布帛百貨盡消。島番土產雲集。西洋立教。建城池聚夷族。地原係呂宋土番。今爲據轄。漢人娶本地土番婦者。必入其教。禮天主堂。用油水畫十字於邱堂。名曰澆水。焚父母神主。老終歸天主堂。挖坑土親膚而埋。富者納貲較多。寡埋堂上基內。貧者埋牆外。三年一清。棄骸骨於深澗。所有家貲明於公堂。天主妻子作三股均分。其蠱殊甚。母傳女而不傳子。卽如牛皮。

火腿咒法縮小如沙。令人食而脹斃。又有蝦蟆魚蠱之類。彼能咒解。從口躍出成盆。禁龍陽。父子兄弟亦不得共寢蓆。夜啟戶聽彼稽察。拭床蓆驗有兩溫氣者。捕以買罰。晨鳴鐘爲日。方許開市肆經營。午鳴鐘爲夜。闔市寢閉不敢往來。昏鳴鐘爲日。燈燭輝煌如晝營生。夜半鳴鐘爲夜。以閉市肆。晝夜各以三時辰爲日爲夜。傍午捉夜禁。闔地皆鬼市。下接利仔。水程十二更。至甘馬力。水程二十一更。二處漢人從呂

宋舟楫往彼貿易。利仔反之東南。隔海對峙有五島。
班愛惡黨宿務。猫務烟。網巾礁腦。中國俱有洋艘往
通。均係土番族類。山海所產與呂宋同。如鹿麕牛皮。
筋脯。蘇木。烏木。降香。東香。黃蠟。燕窩。海參等類。水程
必由呂宋之利仔反海而南。呂宋至班愛十更。至惡
黨二十三更。至宿務二十四更。至網巾礁腦五十八
更。人愚罔有知識。家無所蓄。需中國布帛以蔽身。國
各有王。惟謹守國土。其東南又有萬老高。丁機宜。二

國居於己方。國土人物產類相似。水程呂宋至萬老
高一百七十四更。至丁機宜二百一十更。由呂宋正
南而視。有一大山。總名無來由息力大山。山之東爲
蘇祿。從古未奉朝貢。雍正戊申六年。至閩貢獻。西隣
吉里問。又沿西文萊。卽古婆羅國。再繞西朱葛礁喇。
大山之正南爲馬神。其山之廣大長短。莫能度測。山
中人跡所不到。產野獸亦莫能名其狀。蘇祿吉里問
文萊三國。皆從呂宋之南分籌。而朱葛礁喇必從粵。

南之七洲洋過崑崙茶盤。向東而至朱葛礁喇。一百
八十八更。馬神亦從茶盤噶喇吧而往。水程三百四
十更。廈門由呂宋至蘇祿。水程不過一百一十更。共
在一山。南北遠近相去懸殊矣。又隔東海一帶爲朥
佳虱大山。由馬神至朥佳虱。水程二十七更。復繞而
之東。卽係丁機宜。東北係萬老高。而蘇祿吉里問文
萊。朱葛礁喇。總名皆爲無來。由繞阿畚。性喜銅鉦。器
皿皆銅。沿溪簪屋爲居。俗甚陋。身不離刃。精於標槍。

見血卽斃。以采色布帛成幅衣身。經商其地。往來乘
莽甲。卽小舟夥從持利器相隨。產珍珠水片玳瑁海

參燕窩烏木降香海菜藤等類。而馬神畜性相似。人
尤狡獪。紅毛人曾據其港口。欲佔其地。番畏火礮莫
敢敵。入山以避。用毒草浸洗上流。使其受毒而自去。
產銅鑽胡椒檀香降香科藤豆蔻冰片鉛錫燕窩翠
羽海參等類。鑽有五色。金黑紅者爲貴。置之暮夜密
室。光能透徹。投之爛泥汚中。上幔青布。其光透出。各

番以爲首寶。大如棋子。值價十萬餘兩。西洋人購之
爲至寶。呂宋至吉里問三十九更。至文萊四十二更。
此皆東南洋番國。而朱葛礁喇馬神。非從呂宋水程。
應入南洋各國。因同蘇祿。文萊南北大山。是以附載
東南洋。俾覽者識其形勢焉。

南洋記

南洋諸國。以中國偏東形勢。用針取向。俱在丁未之間。合天地包涵大西洋。按二十四盤分之。卽在巽巳矣。就安南接聯中國而言。海接廉州。山繞西北而環南。直至占城。形似半月。名曰廣南灣。秦象郡。漢交趾。唐交州。宋安南。明交趾。陸接兩粵雲南。風土人物。史與備載。後以淳化新州。廣義占城。謂廣南。因舅甥委守淳化。隨據馬龍角砲臺。北隔一水。與交趾砲臺爲

界自淳化而南至占城。爲廣南國。亦稱安南王。阮姓。本中國人氏。古日南郡。產金楠。沉諸香。鉛錫。桂皮。象牙。綾絹。燕窩。魚翅。赤菜。糖。與交趾相類。以交趾爲東京。廣南爲西京。強於交趾。南轄祿賴。東埔寨。崑大嗎。西南鄰暹羅。西北接緬甸。栽蒴竹爲城。人善沒。紅毛呷板。風水不順。溜入廣南灣內者。國遣小舟數百人。背竹筒。携細縷。沒水密釘細縷於呷板船底。遠槳牽拽。船以淺閣火焚。而取其輜重。今紅毛呷板。以不見。

廣南山爲戒。見則主駕舟者。曰。駭長國有常刑。廈門
至廣南。由南澳。見廣之魯萬山。瓊之大洲頭。過七州
洋。取廣南外之咕嚕囉山。而至廣南。計水程七十二
更。交趾由七州西。繞北而進。廈門至交趾。水程七十
四更。七州洋在瓊島萬州之東南。凡往南洋者。必經
之所。中國洋艘。不比西洋呷板。用混天儀量天尺。較
日所出。刻量時辰。離水分度。卽知爲某處。中國用羅
經。刻漏沙。以風大小順逆。較更數。每更約水程六十

里風大而順則倍累之。潮頂風逆則減退之。亦知某處心尚懷疑。又應見某處遠山。分別上下山形。用繩駝探水深淺若干。駝底帶蠟油以粘探沙泥。各各配合。方爲確準。獨於七州大洋大洲頭而外。浩浩蕩蕩。罔有山形標識。風極順利。對針亦必六七日始能渡過。而見廣南咕嚕囉。外洋之外。羅山方有準繩。偏東則犯萬里長沙。千里石塘。偏西則恐溜入廣南灣。無西風不能外出。且商船非本赴廣南者。入其境以爲

天送來。稅物倍加。均分猶若不足。比於紅毛人物。兩
空。尚存中國大體。所謂差毫厘。失千里也。七州洋中
有種神鳥。狀似海雁而小。喙尖而紅。脚短而綠。尾帶
一箭長二尺許。名曰箭鳥。船到洋中。飛而來示與人。
爲準。呼是則飛而去。間在疑似。再呼細看。決疑。仍飛
而來。獻紙謝神。則翱翔不知其所之。相傳王三寶下
西洋。呼鳥。揮箭。命在洋中爲記。廣南沿山海至占城。
祿賴。繞西而至東埔寨。廈門至占城。水程一百更。至

東埔寨水程一百一十三更。東埔寨雖另自一國。介在廣暹二國之間。東貢廣南西貢暹羅。稍有不遜。水陸各得並進而征之。番係白頭。無來由裸體居多。以布幅圍下身。名曰水幔。讀平聲地產鉛錫象牙翠毛。

孔雀洋布。蘓木降香。沉香。東諸香。燕窩。海菜。藤。自東埔寨大山繞至西南。爲暹羅。由暹羅沿山海而南。爲斜仔。六坤。大咩。丁噶。叻。彭亨。山聯中國。生向正南。至此而止。又沿海繞山之背。過西。與彭亨隔山而背。坐爲。

柔佛由柔佛而西。爲麻喇甲。卽丁噶叻之後山也。由
麻喇甲而西。出於雲南天竺諸國之西南。爲小西洋
戈什噠。暹羅沿山海而至柔佛。諸國各皆有王。均受
暹羅國所轄。古分羅暹二國。後合爲暹羅國。俗崇佛。
王衣文彩佛像。肉貼飛金。用金皿。陸乘象。亭象輦。舟
駕龍鳳。分官屬曰招誇。以裸體跣足。俯腰蹲踞。見尊
貴。不衣禪而圍水幔。尊敬中國。用漢人爲官屬。理國
政。掌財賦。城郭軒豁。沿溪樓閣羣居。水多鱷魚。從海

口至國城。溪長二千四百里。水深濶。容洋船隨流出入。通黃河支流。夾岸大樹茂林。猿猴采雀。上下呼鳴。畚村錯落。田疇饒廣。農時闢家。棹舟耕種。事畢而回。無俟鋤芸。穀熟仍棹收穫而歸。粟藁長二丈許。以爲入貢土物。因播秧畢。而黃河水至。苗隨水以長。水尺苗尺。水丈苗丈。無澇傷之患。水退而稻熟矣。幹河入山。勢猛而急。支河入西域。歸東埔寨。暹羅以出海。勢散而緩。田疇藉以肥饒。故產米之國。石可三星。俗

語捕鹿枝頭。牽牛上樓。蓋鹿爲水漂沒。閣息於樹梢。
溪屋爲水注浸。引牛於樓。人有被虎咬。鱷吞者。告於
番僧。僧咒拘而虎自至。咒攄綿紗於水。而鱷自縛。剖
而視之。形骸猶存。有受蠱者。向僧求咒。則解。是以俗
重佛教。富者卒後葬以空。卽釋氏塔也。又有一種男
女。名謂尸羅蠻。與人無異。但目無瞳子。人娶之。亦生
男女。夜眠。魂變爲狸狗。率類向水廁嗜食糞穢。將明
附魄。若熟睡。翻覆其身。魂不得附歸。女爲經紀。人戲

以酸柑擠汁。嚙之。眼淚長流而不可忍。人染痢者。若不洗滌。夜爲尸羅蠻舐食。化作小物入穀道而食腸腹。故居暹之人。以近水搭厠。便於淨滌。又有一種共人共者。咒法名也。刀刃不能傷。王養以爲兵衛。犯事應刑。令番僧以咒勸化之。使其自退。共法。方與受刑。國多崇魔。相傳三寶到暹羅時。番人稀少。鬼崇更多。與三寶鬪法。勝許居住。一夜各成寺塔。將明而三寶之寺未及覆瓦。視鬼之塔已成。引風以側之。用頭巾。

頂插花代瓦幔覆。今其塔尚側。三寶寺殿。今朽爛。棕繩猶存於屋瓦。洋艘於蓬頂桅上加一布帆。以提吊船身。輕快爲頭巾頂。又於蓬頭之傍加一布帆。以乘風力。船無欹側。而加快爲插花。番病每向三寶求藥。無以濟施。藥投之溪。令其水浴。至今番唐人尚以浴溪澆水爲治病。外洋諸番。以漢人呼唐人。因唐時始通故也。番俗死後焚而後葬。爲消除罪孽。又一種生前發願。死後恬問。飼鳥飼魚者。恬問卽捨身也。恬問。

鳥置之山石之上。羣鳥翱翔畢集。然後內一鳥紅嘴足。先下而啄。羣鳥集下。頃刻僅存髑骨。收而埋之。枯問魚焚化存灰。和麪作塊。投之溪。亦有先飼鳥。後飼魚。兩者皆兼之矣。國造巨艦。載萬餘石。求桅木於深山。大樹先以咒語告求允許。方敢下斧。不則樹出鮮血。動手者立亡。用牛挽輦。沿途番戲以悅之。咒語以勸之。少有不順。則拔木而自回舊地。挽至廠所。其靈方息。產銀鉛錫。洋布。沉束。象牙。犀角。烏木。蘓木。冰片。

降香翠毛牛角鹿筋藤蓆佳文蓆藤黃大楓子豆蔻
燕窩海參海菜以銀豆爲幣大者重四錢中者一錢
次者五分小者二分五厘其名曰潑皆王鑄字號法
不得剪碎零用找以海螺巴廈門至暹羅水程過七
州洋見外羅山向南見玳瑁洲鴨洲見崑崙偏西見
大真嶼小真嶼轉西北取筆架山向北至暹羅港口
竹嶼一百八十八更入港又四十更共水程二百二
十八更而東聯東埔寨僅水程一百十三更何以相

去甚遠。蓋東埔寨南面之海一片盡屬爛泥。故名爛泥尾。下接大橫山。小橫山。是以紆迴外繞而途遠也。由暹羅而南。斜仔六坤。宋脚。皆為暹羅屬國。大咩吉連。丹丁。噶叻。彭亨。諸國沿山相續。俱由小真嶼向西分往。水程均一百五六十更不等。土產鉛錫。翠毛。佳文。蓆。燕窩。海參。科藤。水片等類相同。惟丁噶叻。胡椒。甲於諸番。為美。番皆無來由。族類不識義理。裸體挾刃。下圍幅幔。檳榔夾烟嚼。國米和水吞。貿易難容多。

艘而柔佛一國山雖聯於彭亨其勢在下水路應到
崑崙用未針取茶盤。轉西至柔佛計廈門水程一百
七十三更。番情與上諸國相似。而所產相同。較之畧
美而倍多。年經商可容三四船。就舟交易。產沙金。國
以鑄花小金錢爲幣。重四五分。銀幣不行。由柔佛而
西。麻喇甲亦係無來由族類。官屬名曰惡耶。國王彷彿
暹羅。用漢人理國事。掌財賦。產金銀西洋布犀角象牙
鉛錫胡椒降香蘇木燕窩翠毛佳文席等類。金錢

銀幣皆互用。往西海洋。中國洋艘從未經歷。到此而止。廈門水程二百六十更。至於小西洋。烏鬼國。大西洋。雖與大塊相聯。西洋呷板來往。語具大小西洋記。麻喇甲南隔海對峙。大山爲亞齊。係紅毛人分駐。凡紅毛呷板往小西洋等處。埔頭貿易。必由亞齊經過。添備水米。自亞齊大山生繞過東南。爲萬古屢。盡處與噶喇吧隔洋對峙。紅毛回大西洋者。必從此洋出。然後向西南。過烏鬼呷。繞西至大西洋。就中國往噶

喇吧而言。必從崑崙茶盤。純用未針。西循萬古屢山。而至噶喇吧。廈門計水程二百八十更。原係無來由地方。爲紅毛荷蘭所據。分官屬名曰呷必丹。外統下港。萬丹池。問三處。下港產胡椒。萬丹另埔頭池。問產胡椒檀香。而噶喇吧甲諸島。番埔頭之盛。各處船隻聚集貿易。中國大西洋小西洋白頭烏鬼。無來由島。番罄珍寶物。食無所不至。荷蘭建城池。分埔頭。中國人在彼經商耕種者甚多。年給丁票銀五六金。方許。

居住中國人口浩盛。住此地何啻十餘萬。近荷蘭亦以新唐禁革。不許居住。令隨船而回。茶盤一島。居崑崙之南。毗於萬古屢山之東。皆南洋總路。水程分途。處島番捕海爲生。產佳水草。頂細而長者。年僅足二席之用。入王家。辟虫蟻。值價四五十金。次者二三十金。值一二金者。猶錦繡布褐之相去也。

小西洋記

小西洋居於丙午丁未方。從麻喇甲遲羅。繞西沿山。而至於白頭番國。人卽西域之狀。捲鬚環耳。衣西洋布。大領小袖。纏腰裹白頭。故以白頭呼之。國有二。東爲小白頭。西爲包社大白頭。二國北接三馬爾丹。卽噶爾旦之本國也。而三馬爾丹之北。鄰細密里也。國而細密里也。之西。爲俄羅斯國。小白頭。東鄰民呀國。民呀人黑。穿着皆白。類似白頭。英機黎。荷蘭佛蘭西。

聚此貿易。民呀之東。接天竺佛國。民呀之東南。遠及
暹羅。民呀之南。臨海。民呀之北。接哪嗎西藏。及三馬
爾丹國屬。而小白頭。南入於海之地。曰戈什塔。東西
南三面。皆臨大海。外懸一島。曰西崙。中產大珠。戈什
塔東之沿海。地名有三。曰網礁臘。係英機黎埔頭。曰
房低者里。係佛蘭西埔頭。曰呢顏八達。係荷蘭埔頭。
西之沿海。地名有二。曰蘇喇。曰網買。皆英機黎埔頭。
其地俱係紅毛置買所建也。○包社大白頭國。東鄰

小白頭。北與小白頭皆聯三馬爾丹。西北枕裏海。西鄰東多爾其。西南鄰阿黎米也。南臨大海。○多爾其分東西二國。皆回回。東多爾其國不通海。東鄰大白頭。東北傍裏海。北接惹鹿惹也。西鄰西多爾其。南接阿黎米也。○裏海者。諸國環而繞之。東北細密里也。西北俄羅斯。東三馬爾丹。西惹鹿惹也。西南東多爾其。南包社大白頭。內注大海。不通海。棹其水。惟從包社出海。故爲裏海。○惹鹿惹也。一國亦不通海。東傍

裏海。西傍死海。北聯俄羅斯。南接東西多爾其。女人
姿色美而毛髮紅。氣味臭。衣着同白頭。貢於包社。○
死海者。卽黑海源。從地中。北俄羅斯。南西多爾其。東
惹鹿惹也。西民哖呻。四面環繞。不通大海。故爲死海。
而西多爾其。民哖呻。二國不通小西洋之海。而濱於
中海之東北。中海係從大西洋之海而入。語附大西
洋記。○阿黎米也。東鄰包社。大白頭。北接東西多爾
其。西北濱於大西洋之中海。西聯烏鬼國陸地。一隅。

自西至西南與烏鬼之地。隔對一海。南臨大洋。國爲多爾其所屬。貢男女於多爾。其爲奴婢。○烏鬼國東北山與阿黎米也相聯。向西南生出坤申方大洋。何啻四五國之遠。其盡處曰呷。卽中國支山入海盡處。曰表。表者標也。佛蘭西曰呷。英機黎曰呷。皆順毛烏鬼地方。是以紅毛呷板從小西洋來中國者。由亞齊之北。麻喇甲之南。穿海過柔佛。出茶盤。而至崑崙自呷而東。至戈什塔。自戈什塔而東。至亞齋。其海皆呼

曰小西洋人黑白不同。皆西域裝束。長衫大領小袖。
裹頭纏腰。國富庶。產寶器。生銀洋布。丁香肉果。水安
息吧喇沙末油。蘓合油等類。以金爲幣。鑽石爲寶。

大西洋記

按紅毛等國。居於西北辛戌乾方。而烏鬼自坤申而繞極西。至庚酉方。皆烏鬼族類之國。總而名之曰大西洋。按天圖分度。十二月日月方行到之度。正當烏鬼地方之呬處。乾艮坤三方。博厚相均。而於巽巳之地。缺少。故外生東南斷續諸國。尚未適均。而又於噶喇吧。萬古屢之東南。另生一地。以補東南之缺。因人蹟不到。尚未立名。曾詢之佛蘭西人云。昔時伊國呬

板會到彼處。地有土人。語言不通。執數人而去。後國王遣載之回。此所以地面正四方於適均之處未均。而又補之也。是以西洋人誌四方洋名。以東南缺處之海洋爲小東洋。戈什塔爲小西洋。日本爲大東洋。紅毛爲大西洋。○烏鬼國地方。其順毛烏鬼。北與小西洋。阿黎米也之山相聯。沿海生向西南坤申方。而盡呷處。方繞向西北。與閩年烏鬼王國爲界。又於呷之東面懸海大山。係嗎里呀氏簡烏鬼一國。間有舟。

楫通粵東。自閩年。又向西北。復繞出極西西方。一帶
皆閩年卷毛烏鬼地方。又自西。復往西北。與蘓麻勿
里烏鬼爲界。中有一國。亦名烏鬼國王。西面皆沿海
接聯。北面一帶陸地。俱聯蘓麻勿里。東與接聯阿黎
米也。之順毛烏鬼爲界。周圍皆屬烏鬼地方。種類繁
多。肌骨皆黑。生相不一。地方廣濶。難以族舉。沿海亦
有通舟楫貿易者。各國以爭鬪攘掠爲事。所掠人口。
活者俟紅毛經過。售買爲奴。死者類牲畜。剖塊晒乾。

爲食。蘓麻勿里。西臨大洋。北鄰彌黎。呂黎。惹林。二國。南北相聯。人口稀少。山林深密。多產奇狀野獸。彌黎。呂黎。惹林。西臨大洋。北一帶與猫喇猫里也。毗聯。猫喇猫里也。乃回回族類。多爲海賊。在中海西海刼掠。西臨大洋。北一帶與紅毛隔中海對峙。海從西入東。自隔海之西北而東。沿中海有葡萄牙。是班牙。佛蘭西。那嗎。民哖呻。西多爾其。而盡中海之東處。阿黎米也。由阿黎米也。而向西。直出至西洋。皆猫喇猫里也。

中海沿邊之地。南北東諸國三面夾繞。惟西通外海。是爲中海。海產珊瑚。西洋人來中國者。謂中海阿黎米也之地。西聯烏鬼陸地。處恨不能用刀截斷。卽於中海可通阿黎米也。內海而出小西洋。戈什塔至亞齊。出茶盤。何用繞極西極西南極東南而至噶喇吧。北上茶盤。遠近相去。年餘之遠也。○葡萄牙者。澳門之祖家也。東北二面地鄰。是班呀。西臨大洋。南俯中海。○是班呀者。呂宋之祖家也。西北臨大洋。東南俯

中海。西鄰葡萄牙。東北接佛蘭西。○佛蘭西者。西臨大洋。北接荷蘭。南鄰是班牙。東接那嗎。東南俯中海。由中海之東。接聯那嗎。○那嗎者。天主教王處也。北接黃祁。東沿中海。而至民哖呻。由民哖呻沿東南中海。而至西多爾其。由西多爾其。東沿中海。至阿黎米也。由阿黎米也。向西沿中海之南。猫喇猫里也之地。而出西洋。○民哖呻者。天主教之族類也。其地東至死海。西接那嗎。北鄰挽雅黃祁二國。南臨中海。○荷蘭

者。噶喇吧之祖家也。西鄰佛蘭西。沿佛蘭西而至西北。皆臨大海。西北隔海對峙英機黎。東鄰黃祁。南接那嗎。由荷蘭北海而至黃祁。○黃祁者。均係紅毛種類。素未通中國。近有舟楫來粵營生。南接那嗎。民咩呻。東鄰普魯社。○普魯社。係俄羅斯種類也。西北接吝因。東鄰細密里也。南接惹鹿惹也。沿海而至細密里也。皆屬北海。○吝因者。西北海之國。亦係紅毛種類。素未通中國。西南隔海與英機黎對峙。○細密里

也東鄰加里勿。東南接噶爾旦。三馬爾丹。南至裏海。
西鄰俄羅斯。北係北海。○英機黎一國。懸三島於吝。
因黃祁。荷蘭佛蘭西。四國之西北海。自吝因沿海而
東。繞俄羅斯。自俄羅斯而東。至細密里也。皆爲北海。
不能行舟。海冰不解。故爲冰海。自吝因而南。至烏鬼。
諸國。皆爲大西洋。紅毛者。西北諸番之總名。淨鬚髮。
披帶赭毛。戴青毡卷笠。短衣袖。繫襪而皮履。高後底。
畧與俄羅斯至京師者相似。高準碧眸。間有與中國

人相似者。身長而心細巧。凡製作皆堅緻巧思。精於火礮。究勘天文地理。俗無納妾。各國語言各別。以摘帽爲禮。而尊天主者。惟于絲腦。是班牙。葡萄牙。黃和爲最。而辟之者。惟英機黎一國。產生銀哆囉呢羽毛。緞。啤。岐。玻璃等類。

聯聖文與神聖

為易而納之普卦。英剌聚一國。至土。地多。難。於。手。

動。為。甄。而。尊。天。主。普。卦。于。絲。湖。星。斑。不。節。薩。和。黃。臨。

火。變。空。博。天。文。此。野。谷。無。辭。矣。各。國。語。言。各。限。以。辭。

人。卧。以。普。良。其。而。心。聯。改。八。變。卦。普。聖。燦。不。思。辭。伏。

崑崙

又呼崑市

崑崙者。非黃河所繞之崑崙也。七州洋之南。大小二山。屹立澎湃。呼爲大崑崙。小崑崙。山尤甚異。上產佳果。無人蹟。神龍蟠踞。昔荷蘭失臺灣。邊海界禁未復。因金厦二島平。荷蘭掠普陀。毀銅像。銅鐘。萬厯間。官塑脫紗佛像。刀刃不能傷。駕火礮壞之。取裏所實金銀財寶。見像必剖。以取臍寶。悉收而去。至崑崙。意欲居之。龍與爲患。藉火礮與龍鬪。相持有日。後荷蘭狀

若顛狂。自相戲。以曲腕擊背心。日益斃。揚帆而去。將至噶喇吧。船擊碎。存活者可十人。雍正丁未歲夏。噶喇吧海面立一中國婦人。羣相棹舟往視。惟浮一銅鐘。上鐫普陀白華庵。知爲昔荷蘭掠沉回浙洋艘。互相爭載。以藉神庇。公議求筊。余戚末黃姓彥者。本船舵師。得筊載回。通港之艘。惟此舟小而舊敝。順帆不及。月抵南澳。後轉運至普陀。別船堅緻。有被刮紅毛者。有失風水者。佛力如此。前惟付之劫數耳。余少隨

先君任浙聞之白華住持剖疑者常言小沙彌時在山被紅毛刼掠逃匿虛張情景今恍惚將三十年恨僧未之見也康熙四十五六年間紅毛又圖崑崙不敢近山居住就海傍立埔頭以崑崙介各洋四通之所嗜涎不休有中國洋艘載磚瓦往易紅毛洋貨以其本廉而利大夜團宿於沙洲人寂寂稀少後密窺知爲鱷魚步岸所吞伐木圍柵稍寧夜聞山中語語促歸紅毛爲水土不服斃者甚多又爲廣南番刼殺

殆盡。仍虛其地。凡中國洋艘由崑崙者。備雞鵝毛。鰲
壳等類。到崑崙洋。天時極晴霽。見黑雲一點。隨化爲
含烟蜿蜒搖尾。卽如江浙夏月湖中雲龍。下蓬惟恐
不及。狂風立至。幸不及時而霽。俗呼鼠尾龍。風白雲
者。其風尤甚。日遇二三次。或四五次。間或不遇者少。
故以翎毛鰲壳焚穢氣。以觸遠楊過崑崙則無。

南澳氣

南澳氣居南澳之東南。嶼小而平。四面挂脚。皆礮古石。底生水草。長丈餘。灣有沙洲。吸四面之流。船不可到。入溜則吸。閣不能返。隔南澳水程七更。古爲落滌。北浮沉皆沙垠。約長二百里。計水程三更餘。盡北處有兩山。名曰東獅象。與臺灣沙馬崎對峙。隔洋濶四更。洋名沙馬崎頭門。氣懸海中。南續沙垠至粵海。爲萬里長沙頭。南隔斷一洋。名曰長沙門。又從南首復

生沙垠至瓊海萬州曰萬里長沙。沙之南又生礪古石至七州洋。名曰千里石塘。長沙一門。西北與南澳西南與平海之大星鼎足三峙。長沙門南北約濶五更。廣之番舶洋艘往東南洋呂宋文萊蘇祿等國者。皆從長沙門而出。北風以南澳爲準。南風以大星爲準。惟江浙閩省往東南洋者。從臺灣沙馬崎頭門過。而至呂宋諸國。西洋呷板從崑崙七州洋東萬里長沙外過沙馬崎頭門而至閩浙日本。以取弓弦直洋。

中國往南洋者。以萬里長沙之外。渺茫無所取準。皆從沙內粵洋而至七州洋。此亦山川地脉聯續之氣。而於汪洋之中。以限海國也。沙有海鳥。大小不同。少見人。遇舟飛宿。人捉不識。懼搏其背。吐魚蝦以爲羹。余在臺丙午年時。有閩船在澎湖南大嶼。被風折桅。飄沙壞有二十人。駕一三板。脚舟用被作布帆。回臺餓斃五人。余詢以何處擊碎。彼僅以沙中爲言。不識地方。又云潮水溜入。不得開出。余語之曰。此萬里長

沙頭也。尚有舊時擊壤一呷板。潮雖溜入。汝等若以
南風棹長潮。再不得歸矣。大洋之水爲沙兩隔。節次
斷續。南北沙頭爲潮汐臨頭。四面合流。外長而內退。
外退而內長。湏沿沙節次撐上。斷續沙頭夾退流。乘
南風東向盡流南退。雖欲北上求生。而南下者。正所
以生也。何也。南風夾退潮。方能出溜。雖溜下。然而歸
於大海。不入內溜。方得乘南風而歸。羣起而呼曰。曾
到此地乎。不則何爲知之確且詳。有如目覩。壤呷板。

尚存爲飛沙汙沒。饑抱海鳥爲餐。渴飲其血。駕長潮
爲溜。所吸不得開頭。三四日無柰。禱筊。棹退潮。溜入
大洋。飄十二日到臺。余又語之曰。呷板飄壞。聞之粵
東七八年矣。你之舟飄風於何處。計風信而度之。諒
在斯矣。至於潮水分合。退爲長。長爲退。夾流雙開。臨
頭滙足。易知近隔。難識遠扞。自有一定之理。在乎海
國形勢於胸中。意會變通。有可到處。有不可到處。安
能處處而指識。豈捺舟者。把死木之所爲哉。則如南

水國圖志卷一
澳氣受四面流水吸入而不出。古爲落漈。試問入而
不出。歸於何處。豈氣下另有一海。以收納乎。四入者
從上而入。必從下而出。如溪流湧急。投以葦蓆。入而
出於他處。此理甚明。並以誌之。



